

# Waageclique Rhywälle

www.waagecliquerhywaelle.ch  
instagram.com/rhywaelle

Fasnacht 2024



Basel 1991

## Sujet:

Nundefaane, wo sin im ED myni Daaten aane?

S git beesi Lyt uff däre schreege Wält,  
die scheffle illegal e huffe Gäld.  
Well niemerts die Gauner duet kenne,  
dien mir si jetzt halt Anonymous nenne.  
Das sin sälli, wo in de Computer umme hägge  
und das wältwyte Internet richtig verdrägge.  
Die halb Wält wott die Hägger pagge,  
doch die dien gmietlig im WWW wyter hagge.

Kirzlig hett me im Erziehigsdepartemänt – ganz unde  
tatsächlich ganz verdächtigi Häggerspuure gfunde.  
Im Basler Internet isch d Uffreeegig riesegross.  
Me ka fascht saage: im ED isch dr Deifel los!  
Die ganz Wält waiss jetzt, dangg World Wide Wepp,  
dass es in Basel nit numme gscheiti Schieler hett.  
Au im Niederholz duet me mit Schregge  
em Beat Jans sini Schuelaggde versteppe.

Im Finanzdep isch me scho fescht am rotiere.  
Wie soll me die Präsfeschträchnige präsentiere?  
Au s Fescht vom Beat Jans haltet d Frau Soland uff Draab.  
Gits e Sonderkonto und wo rächnet me dä Boschten ab?  
D Anonymous gänn dir gärn, über Gäld, e guete Root.  
Und zaige dir im Darknet wie s denn wytergoht.

Bim Häggerle hänn die Gauner, ganz versteppt,  
e gross Broblem bi dr Schuggerei entdeggt.  
D Patroullie hänn bim Tesla, muesch nit lache,  
d Autidiire weder uff no zue kenne mache.  
Dr Grund isch eifach, das waiss jede Deppp,  
well s z Basel aifach zwenig Schugger hett.  
Vor allem ganz iibergscheiti Wääse,  
wo näbenem schryybe au no kenne lääse.

Em Oberstaatsawalt länggts, potznundefaane.  
Fir dä Fall muess dr Alt Kommissär Hunkeler aane.  
EDV und Internet liege ihm aber schambar färn.  
Doch d Basler hänn dä Zofiger Schugger aifach gärn.

Mir 10 Anonymus dien eich vom Waagen aabe griesse  
und d Pause in unserer neye Waagebar richtig gniesse.  
Fir die anonyme Hägger nämme mir Anonymous jetzt Partei  
und sin, wie alli z Basel, 3 Daag frisch und vogelfrei.

*Dää Zeedel het is d TriColor – Print & Copy Shop in Basel druggt. Häärzlige Dangg.  
© Waageclique Rhywälle 2024*

*In aigener Sach:*

### **50 Joor Wage-IG**

*D Wage-IG fiirt in däm Joor iire 50. Geburtsdaag. Hesch d Jubi-Blaggede  
scho? Bstelle kasch sie via [info@wage-ig.ch](mailto:info@wage-ig.ch) und koschte duet sie 10 Frangge.*

*Dängg draa:*

*D Ladäärne-Uusstellig uff em Minschterplatz und d Waage- und Reggwisyte-  
Uusstellig bi dr Kasäärne sin vom Määntig znacht bis am Mittwuch demoorge!  
Deert und an de 3 Verkaufsständ (CINS) in dr Stadt ka men au alli Zeedel  
und Schnitzelbängg, d Blaggede und dr Rädäbäng kaufe.*